



Ils commembers dal comité Pro LTT (da san.) Jon Domenic Parolini, Heinz Dudli, Andrea Züllig, Marcus Caduff e Reto Gurtner, (en schanlihas) Jon Pult e Jürg Kappeler cun lur placat.

FOTO FANDRY

# «Rinforzar ensemen il turissem grischun»

Comité Pro LTT ha preschentà ses arguments

■ (anr/fa) Dal comité «Gea al turissem – gea a la LTT» fan part fin uss 170 exponents da tut las partidas, cun excepziun da la pps, e d'uniuns economicas e turisticas grischunas. Passa in quart èn commembers da la pld. En il Museum da viticultura a Cuira aveva envidà mardi il comité Pro Lescha davart las taxas turisticas (LTT) ad in'orientaziun dals meds da massa. Sco ch'il manader da la campagna *Curdin Mark* ha ditg avevan ins tschernì quest lieu per mussar als viticulturs dal Grischun ch'era els contribuischan lur part per render attractiva la purschida turistica chantunala. Cun excepziun dal viticultur e deputà al cussegl grond *Andrea Davaz* (pps, Maiavilla) sustegnan ses collegas viticulturs la LTT. «Auter che als adversaris da la nova lescha èsi gartegià a nus da fundar in comité che consista gia da 170 persunas da la pbd, pcd, pld, ps e pvl», ha menziunà Mark, «dal co-presidi dal comité fan part ina quarantina d'exponents da tut questas partidas, quai mussa che nus avain grond sustegn era da la populaziun.» Preschents eran set commembers dal co-presidi che han argumentà pertge ch'els sustegnan la LTT.

## Tschintg onns temp per introducir la LTT

Il deputà Heinz Dudli (pbd, Tschintg Vitgs), president da la cumissiun prede-

liberanta, ha menziunà il grond sustegn da la LTT era en il parlament grischun. Quel ha sustegnì la lescha en la sessiun d'avrigl cun dus terzs da las vuschs. «Cun la LTT ha stgaffì il cussegl grond las premissas per in svilup prosperaivel da noss turissem, causa ch'ella garantisce la finanziaziun da basa da las destinaziuns turisticas per il marketing e per stgaffir novas purschidas turisticas», ha argumentà Dudli. Deputà *Marcus Caduff* (pcd, Lumnezia) ha menziunà che la LTT pussibiliteschia da concluder la refurma turistica, «la quala contribuescha ina gronda part per mantegnair e stgaffir novas plazzas da lavur en las regiuns periferas.» Il deputà *Jon Domenic Parolini* (pbd, Suot Tasna) ha ditg ch'i saja l'interess da tut las Grischunas e Grischuns d'avair in turissem che flureschia: «Perquai dovrain nus la LTT e betg 120 leschas da vischnanca differentas.» El ha rendì attent che las vischnancas hajan tschintg onns temp d'introducìr la nova lescha.

## «Per ch'il turissem grischun restia competitiv»

L'interprendider *Reto Gurtner* che è dapi l'entschatta commember da la gruppa che refurmescha il turissem grischun ha menziunà che la LTT procura per la medema finanziaziun turistica en tut il

chantun: «Quai è in grond agid per las destinaziuns turisticas per planisar lur expensas.» El na po enclerger ch'ina part dals commembers da la gruppa d'experts ch'eran tuts per in'imposiziun da taglia tenor la capaciad veglian uss puspè ina taxa da cura tenor da las frequenzas. Per il president da l'hotelleriesuisse Grischun *Andreas Züllig* è la LTT en mintgas necessaria, «be cun ella po il turissem grischun restar abel da concurrer cun l'ester, ma era cun autras regiuns en Svizra.»

## «Ina lescha pli gista che fin uss»

Per far frunt a la crisi economica èsi a l'avis dal deputà *Jürg Kappeler* (pvl, Cuira) necessari da fortifitgar la branscha economica la pli impurtanta dal Grischun, il turissem: «E quai ans gartegia be, sche nus essan solidarics cun tut las regiuns en chantun, e quai è pussaivel cun la LTT.» Deputà *Jon Pult* (ps, Cuira) ha ditg che la lescha obligheschia tut las interpresas da contribuir lur part per finanziar il turissem: «Ozendi pajan interpresas da Tavau, Arosa, Engiadina u Flem ina taxa turistica, entant ch'interpresas da Cuira, Domat u Landquart, che profitan era dal turissem, na pajan nagut. La LTT dentant procurass che quels che profitan il pli bler dal turissem avessan era da pajar las pli grondas taxas.»